

محمد حمدى

# أبويامات

أشعار بالعامية المصرية

طبعة أولى أغسطس 2018

# بطاقة الكتاب

عنوان المؤلف : أبويا مات  
المؤلف : محمد حمدي  
التصنيف : أشعار  
رقم الإيداع : 2018-14266  
الترقيم الدولي : 978-977-6656-47-5  
عدد الصفحات : 100 صفحة  
رقم الإصدار الداخلي : 35  
تصميم الغلاف : الشاعر محمد حمدي  
الإخراج الفني : الشاعر محمد الساعي

جميع حقوق الطبع والنشر محفوظة للشاعر، ولا يحق لأي دار نشر طبع  
ونشر وتوزيع الكتاب إلا بموافقة كتابية وموثقة من الشاعر

## دار النيل والفرات للنشر والتوزيع

ثورة مصرية تشرق إبداعاً على الوطن العربي

المدير العام  
جابر الزهيري

رئيس مجلس الإدارة  
ناجي عبد المنعم



للنشر والتوزيع  
أسسها الناشر ناجي عبد المنعم

رخصة مزاولة مهنة: 58365 - سجل تجاري: 2017 / 13242 - بطاقة ضريبية: 35-01-572  
عضو عامل باتحاد الناشرين المصريين رقم 941 لسنة 2018  
هاتف: 01011256943 - 01116202218 - 01202541192 تليفاكس: 020554372901  
alnilwaalfourat@gmail.com alnilwaalfourat

المقر الرئيسي: ج.م.م. محافظة الشرقية - العاشر من رمضان - مجاورة 13 - أمام سنتر الـ 13 - عقار 304  
ج.م.م. محافظة المنيا - أبو قرقاص - شرق الزعة - خلف محطة السكة الحديد - هاتف 086214428  
ج.م.م. محافظة القليوبية - مركز طوخ - إيمى - هاتف 0132424735

(القروء)

# الإهداء

إلى أبي  
الذي منحني نبضة الحياة  
وضخ في شرياني دمه  
فتنفسه قبل أن اتنفس الهواء  
إلى أبي

الذي علمني معنى الحياة  
وأرشدني في كل خطوة أخطوها  
إليك يا من رحلت وتركتني نصف روح  
أهدي لك باقي روحي في كلماتي تلك  
لعلّي بها أستطيع التعبير عن مدى  
افتقادي وحاجتي إليك

محمد حمدي

## قبل أول قصيدة

مثلث الهبة والموهبة والإرادة إشكالية قتلها الفلاسفة  
والباحثون بحثًا وانتهوا إلى حقيقة واحدة " كل إنسان يُخلق  
ومعه الهبة التي تتجسد في الشكل والجسم ويُمنح المبدع  
الموهبة التي تميزه عن غيره ثم يضيف هو الضلع الثالث  
الإرادة ليكتمل المثلث

والشاعر محمد حمدي دلى وبرهن على هذا التطور من  
خلال كتابه ( أبويا مات ) فتعامل مع الموهبة ليقدم لنا كتابه  
الرائع وبالإرادة استطاع أن يلوى عنان اللفظة ويوظفها  
كيفما شاء في كل مواضع الكتاب مستخدما أدواته من لفظة  
وموسيقى خارجية وداخلية وصور شعرية بسيطة ومركبة  
واختيار موضوعاته بدقة متناهية حتى أنه يبني النص  
الشعري على لفظة واحدة قد تتصاعد فيما بعد إلى قضية  
كبيرة وإشكالية أكبر يدفعنا دفعا للتواصل معه ايجابيا  
وفي النهاية نقدم كتابا قيما للمكتبة العربية

الشاعر الناقد

ناجى عبد المنعم

# أبويا مات

فات اللي فات  
باقي اللي باقي  
وانا لما شوفتك وقتها  
مكانش ييجي ف بالي  
ان دا اخر تلاقي  
فات اللي فات  
و فلحظة عمّ عالكون  
السُّكّات  
جاتلي الرساله ف كلمتين  
بيقولولي  
"أبويا مات"  
أبويا مات  
وساعتها كُنت لوحدي  
فِ بلاد متعرفنيش  
الكون بحالُه وقِف  
والوقت مبيمشيش  
لحظة ماشوفت الخبر  
مكانش شيء حواليا  
ف عنيا مببيكيش  
لكن بيبكي من سكّات

ابويا مات  
أبويا م الليلة ف بيت الحق  
وعند الحق ضيفه  
و م الليلة  
مش هسمع صوته تاني  
ومش هقابله  
ومش هشوفه  
قالولي كان تعبان  
واوعاك تحزن عشان  
ده ارتاح من شدته  
ربه اللي خلقه كتب له  
من وجعه راحتته ورحمته  
مرض خبيث فيه انتشر  
ارتاح وساب دنيا البشر  
وسابلي بس منه ملامحه  
هتفضل ساكنه فيا  
وكام هدمه من ريحته  
ودعوة حلوه  
دعاها ليا  
وذكرياته معايا  
ف طول العمر اللي فات  
أبويا مات  
يارب راضي

ومش ف ايدي الاعتراض  
الموت حقيقة أكيدة  
ماهوش احتمال ولا افتراض  
وعارف ان أبويا أمانه  
وصاحبها شاء .. ف ردها  
بس اللي راح  
كان غالي عندي أوي  
والصدمة انا مُش قدها  
يارب بدعيْلُه ترحمُه  
يارب وعالفراق قَدّرني  
مفيش معايا حدّ  
غيرك يصبرني  
قاعد لوحدي بفكر لُه  
ف كل حاجة حلوة  
أنا عِشتها وياه  
شايِل هموم بُعده  
ويوم رجوعي لَمّا  
هادخل عليه .. مالقاه  
يابويا ابنك تاه  
هاتحمل ازاي اللي جاي  
وانا بنتهي  
من بعد ماجاني الخبر  
ب يادوب ساعات

أبويا مات  
هفضل يابويا  
مهما طال العمر فاكرك  
هبقا امتدادك  
وحتى ف بعادك  
هعمل حساب خاطرك  
هصلي وادعيلك  
تكون ف الجنة متهني  
هعيش بحُبك ليا  
وبحُبي ليك  
ولحد يوم أقايا بيك  
صابر ومستني  
وهاصلي وادعيلك  
تكون ف الجنة متهني  
يارب  
بحق جاه حبيبك النبي  
تسامحه  
على أي ذنب فِ اللي فات  
ابويا مات  
ساعة الوداع  
لقيت نور الشمس  
فجأة ضعيف وخافت  
حسيت بقلبي خاف وعيني



بين دموعي اتدارت وخافت  
حتى روحي رافضة  
انها تصدق  
ان السنين بيني وبين ابويا  
هتفرّق  
و ف الوداع  
كل احساسى بانى على قيد الحياه  
من جوايا ضاع  
حسيت كإن الكون بحاله  
فجأة مات  
لما قالوا عن أبويا  
إنه مات  
أبويا مات  
وبقيت يابويا خلاص  
عايش هنا بدونك  
وانت هناك بقيت لوحديك  
بدون اخواتي وبدوني  
الناس جايين يابويا  
فيك انت يعزوني؟!  
ويصبروني  
بطبطبة مع دمعتين  
ويفكرونى بكلام ربنا  
ويقرولي م القرآن آيات



ودموعي تكتّم جوايا الآهات  
وانا برضه لسه مش مصدق  
إن ...  
أبويا مات

# حياة مدرسة

احنا ف حياة مدرسة  
كبيرة من غير سور  
اخرها حفرة و تراب  
مهما نعيش ف قصور  
على ادا ما بنتعلم  
لازم اكيد نتألم  
والحزن مهما يعلم  
ف ادينا نلقى النور  
دا حنا ف حياة مدرسة  
لكنها بدون سور  
اقبل وعيش و ارضى  
دا غيرك حلمه يبقا مكانك  
ارمي الحمول ياللي  
عشت شايل الهم  
ادعي لروحك مين !!  
ف يوم هايدعي عشائك  
مهما الحمول بتزيد  
مسيرها يوم تتلم  
غيرك في ناس بيبكوا



من وجعهم دم  
ياللي زعلت وناسي  
إن انت كدا كسبان  
ربك كبير وقريب  
وعنده علم الغيب  
لو كنت تعرف أنك  
ف مرة راح تتخان  
وزعلت من جواك  
يبقا انت فيك العيب  
دي النخوة اغلى  
من اعز حبيب  
رُد الجميل و او عاك  
تكون ف يوم ناكر  
دا ابن الاصول  
على طول لوحده يبان  
انسى اللي ليك لكن  
دايما تكون فاكر  
اللي عليك لازم  
ف يوم ترده عشان  
تبقا فقير عادي  
ومايقولوش دا جبان  
و او عاك ف يوم تغدر  
دا الدنيا دواره

ولو حد يوم خانك  
ماتمدلوش ايدك  
ابعد عن الخاين  
ماتقولش دي خسارة  
واشطب اوام اسمه  
من كشف مواعيدك  
قلبك يشيل همك  
عقلك يكون سيدك  
حاول من قلبك تضحك  
ودايما خليك عارف  
فكر نفسك بس بربك  
وافتح بالخير للخير قلبك  
بات مظلوم مش ظالم خاين  
او غدار او خايف  
ربك رب قلوب ومابينهم  
قلب تحبه وهو يحبك  
داوي بروحك كل جروحك  
وارسم بالنور للنور حبك  
اعشق حب و اوعد لكن  
لازم توفي بصدق بوعدك  
وكل اللي انت عملته امبارح  
مهما يعدي ويبعد عنك استناه  
الايام دي ديون ولا بد ف يوم تترد

واللي زرعتة ف عمرك  
لازم يوم تلقاه  
ذنبك جنبك عمره ماينسى  
حتى لو انت اللي بتنساه  
اتألم واخسر بس ارجع قوم  
ماتسيبش الدنيا تهدك يوم  
عامل احزانك ك الكوابيس  
لازم تخلص وتقوم م النوم  
وبضحكك ع الحزن تداري  
اعمل ضحكك

شيء اجباري  
ياللي ورثت المرار  
ومن الشقا طبعك  
كمل وعافر و اوعاك  
تقع ف يوم وتطاطي  
شق الكفوف دا شرف  
مرسوم على صوابك  
و رزق الحلال متعه  
وبركة من العاطي  
واللي لقا بدون شقا  
طبعه يكون واطي  
وافكر مين  
اللي ف شدتك ودك

ومين ف وقت المصلحه  
تلاقيه معاك  
واللي يحبك  
عمره ف يوم ما يهدك  
اما الجبان وقت احتياجك  
هو اوام ينسأك  
سيب اللي سابك يوم  
واستنى اللي يستناك  
احنا ف حياة مدرسة  
لكنها بدون سور  
اخرها حفرة تراب  
مهما نعيش ف قصور  
على اد ما بنتعلم  
لازم اكيد نتألم  
والحزن مهما يعلم  
بادينا نلقى النور  
احنا ف حياة مدرسة  
كبيرة من غير سور

## معلش مافيش

ليه برضه الرد عليا مازال  
# معلش .. # مفيش  
ليه كل مابطلب شيء ليا  
م الناس او حتى من الدنيا  
بيكون طلبي قصادي ولكن  
مع ناس تانية  
وسؤال معتاد  
هتبطل امتي الدنيا عناد  
وتبطل امتي تقولي مافيش  
طب دانا بتغير والله  
وبعدت عن السكة اياها  
هتحنّي وترضي عليا بقا  
ولا هترميني ف متاهه  
بطلت اسهر ويا صحابي  
او برة البيت لو ليلة أبات  
بطلت بنات  
وبطلت أماكن مشبوهة  
وبطلت حاجات  
وحاجات وحاجات



رغم ان الناس يحبوها  
طب والله انا بطلت حشيش  
ولو حد سألني على سجارة  
بحلف إني بطلت خلاص  
وبقول معيش  
فياريت الدنيا عليا تحن  
قربت اتجن  
من كُتر مابتقولي يوماتي  
معلش .. مافيش

# مين فينا

مين فينا  
يادوب عايش لانه  
ياعيني لسه ماماتش  
ومين حب وحببيه باعه  
وف حبه مايتقدرش  
ومين ضيع طريقه وتاه  
وصوته باينه فيه الاله  
ومين مسجون في قلبه النبض  
اللي متكتف وماتحررش  
ومين فينا مشافش الحلم  
وعاش جواه وماتحققش  
ومين فينا يادوب عايش  
لانه ياعيني لسه ماماتش  
ومين فينا  
ومين فينا بدال المرة  
100 مرة ينام زعلان  
ومين فينا ما عاش العمر  
يتمنى يكون فرحان  
ومين فينا اللي ماتعلمش

ومين ماآساش وماتألمش  
ومين حب بكل مافيه وبرضه اتخان  
ومين فينا بدال المرة  
100 مرة ينام زعلان  
ومين ماشفش الدنيا ف عيونه  
بلون اسود  
وكان نفسه تكون الوان

# أنا الكذاب

انا كذاب  
كل اللي يسالني عليا  
احلف واقول اني بخير  
انا عادي ومفيش حاجة فيا  
وانا اللي جوايا كتير  
انا اللي جوايا كبير  
طب هعمل ايه  
بضطر اكذب  
انا اصلي متعودتش اني  
اكون وحيد  
طول عمري عيل  
ولا بقدر اتحمل بعد اهلي  
او اني اكون وحيد  
او اكون بعيد  
الغربة دي وردة بلاستيك  
الوانها حلوة بدون معنى  
نحلم ف يوم نوصل ليها  
ولا حاجة منها ترجعنا  
ولما يبعد وبهاجر

الغربة وقتها تحلالي  
فرحان بكلمة انا مسافر  
اتاريها ناوية وشايلالي  
وبعد فترة والثانية  
يبدأ حنيني يأنبني  
واحلم بساعه ولو ثانية  
مع امي او اخويا او ابني  
محبوس ف انترنت وكاميرا  
وسنين بتجري ولا انا شايف  
الدمعه محبوسه ومرة  
انا نفسي ارجع مش عارف  
واكذب واقول ان انا عادي  
واضحك واهزر واهيس  
وانا حلمي ابوس ارض بلادي  
دا محدش ف الغربة كويس  
سامحيني يامه ان انا سيبتك  
وف وقت تعبك مش موجود  
والله مانا لاقى ف طبيبتك  
ياما نفسي بين احضانك اعود  
وحبيبتى اللي انا غايب عنها  
يا ما نفسي ارجع اعوضها  
عن صبرها وعن حرمانها  
و ف حضني طول عمري اخدها

## إتعودت

انا اتعودت على وجودكم  
حقيقي فرحت بفرحكم  
وكننت معاكوا شيء تاني  
طموحي ملاني  
وحبي ليكو خلاني  
أغير كل شيء فيا  
عشانكم  
كل شيء ليا  
ومهما ابعد وعنك اغيب  
ماهتهونوا ف لحظة عليا  
ورغم الغربة والمسافات  
باقيلكو جوة قلبي حاجات  
لا يمكن حاجه تمحيها  
ولما اتعب وعيني تنام  
ذكر اكم ف عز النوم  
تصحيها  
انا باقي  
ولو حتى مانيش لاقى  
على بعادكم

بدیل عنکم  
یصبرنی  
ولکن وحده رب الـکون  
یقدرنی  
وبیا تانی  
یجمعکم  
لانی تعبـت  
لما بعدت

..  
مانا اتعودت  
علی وجودکم  
وحقیقی فرحت  
بفرحکم

## تحضير الجن

ملكوش غير النصيحة .. وبعديها اتصرفو  
تحضير الجن سهل .. الصعب نصرفو  
هتلومو .. لومو روحكو  
اختارتو اللي جاركو  
متجوش تبكولي لما  
بدمو عكم تنزفو  
ملكوش غير النصيحة .. وبعديها اتصرفو  
تحضير الجن سهل .. الصعب نصرفو  
اختارتو اللي يبيع  
وسبتو اللي عليكو باقي  
ما الغالي لما يرخص  
غير الرخيص مانلاقي  
وبعد ما نختار بايدنا  
اللي ببيحي علينا  
بادينا نارنا ايدنا  
ولا خافو يوم علينا  
بنجيب العيب ف غيرنا



نرجع ونقول نصيب  
ولو كنا راجعنا روحنا  
كنا اختارنا نسيب  
كان لازم يوم هنندم  
على سوء الاختيار  
لكن هايفيد بايه  
واحنا عايشين ف نار  
لا ف يوم الدنيا وقفت  
على خاين باع ضميره  
ولا شوفنا ف مرة طير  
مات لما سابه طيره  
الحق حق مهما  
حاولنا نحرفو  
ملكوش غير النصيحة .. و بعديها اتصرفو  
تحضير الجن سهل .. الصعب نصرفو

# الآشيه فُلْ

شايِل هموم  
والفكر بقا ساكن ملامحك  
وغير ف شكلك  
سايب مشاكلك  
للزمان مع الزمان يحلها  
وداير على صحابك  
ف مشاكلهم تحل  
و ف عز مانت ف ازمتك  
بتقول رضا والقاشية فُلْ  
بقا كله عارف ان خيرك  
من حظ غيرك  
زاهد حياتك  
عمرك بيجري  
القطر فاتك  
وتقول دا قدري  
بتشيل ف هم  
والهم تقل خطوتك

و ف عز قسوة رحلتك  
دايما تقول .. لا مش مهم  
بس الأهم  
كل ال حواليا يعيشوا ف برضا  
طب وانت  
انا ؟

انا خلاص عمري انقضى  
وكفاية اعيش وانا مرتاح ضميري  
ورضميري يرتاح لما اكون  
سبب السعادة لحد غيري  
بس انت نفسك ليها برضه حقوق عليك  
ازاي تهون نفسك عليك  
وترد شعرا او قانون  
وتقول والله فرحتي  
ف فرحة اللي بحبهم  
وكفاية احس بحبهم  
.. مين ف الزمان دا لسه بيحس كدا  
مين ال فيه الخير يادنيا بالشكل دا  
..وبقيننا نستغرب من اللي يكون أصيل  
والعادي بل والمنطقي

ناخذ كثير .. ندي قَليل  
يادنيا ظالمة  
نهارها ليل  
يا خلق حسوا ببعضكوا  
ردوا الحقوق لأهلها  
صحّوا القلوب  
من جهلها  
صدقوني الدنيا زائلة  
ومهما طالت  
مفيهاش خلود  
ولا بالفلوس  
ولا بالمحايلة  
قُصر الكلام  
ع الدنيا والناس والضمير  
يلا السلام  
يلا سلام

## اعتصموا

فرح الأحبة كان جميل لَمَّا  
نبقاف هنا كلنا ولمّة  
جوة الحاجات كان فيه حاجات  
بتحلي طعم الدنيا لما تعاند  
وانا قلبي مش جامد  
مش حمل صدمة  
قلبي شبع صدمات  
و القلب زي الكلب  
مخلص ولقمة بتكفيه  
او طبطبة  
او بصة حلوة حنيّة  
من حد غالي عليه  
بزيادة تيجوا عليه  
الحزن عشش ف الملامح  
والعيون بتإن  
الشيب صبح ملهوش علاقة  
بالسنين والسن

والزمان عمره ماكان السبب  
ف الفرقة والمحنة  
العيب دا فينا احنا  
والله يا جماعة  
فبلاش نعلق جحودنا وقسوة قلوبنا  
ع الزمان  
ونعمله شماعه  
الفرقة ضعف  
ووجعها غير أي وجع تاني  
وبيقا بينا ليه واحد مننا اناني  
اللمة .. جاه  
والوحده .. آه  
وزي ما اتعلمنا من ديننا  
"اعتصموا بحبل الله"

## ما تهيبش

أبويا قالي :

ماتهبش حد

و اوعى لسانك بغير الحق

يتكلم

لو مهما كان اللي في يوم هتشوفه

او مهما كنت بعد قولة الحق

هتتألم

قول للخسيس يا خسيس

قول للرخيص يا رخيص

افضح جنون العاشقين

قول اللي مش قادر لسانهم

يوم يقوله

العمر يتقاس بحاجات كتيرة

مش بطوله

اكسر بقوة كل صمت

كان ف يوم ساجنك

او كان عليك حاكم

وهيجرى ايه

ايه؟

هتتحاكم !

لسه القانون مفيهوش للفضضة تهمة

واحنا مابين الكذب والتمثيل

والغش والتضليل

ضعنا وخلص .. توهنا

بتحب؟

قول

وسيب النصيب ياخذ قرار

وانت عليك تختار

وطول ما نيتك صافية

كلمة .. يارب كافية

وربك كريم وعظيم

ولكل شيء مقدار

امسك ف حلمك ومتسيبش حاجة تهدمه

ضِل الظروف عفريت واسمه الخوف

وانت بايديك تقدر عليه

تعدمه

طول ما الطموح والروح



بيسروا جوة منك  
ماتخافش يوم غير م اللي خلقك  
ثم منك  
انت الملاك  
وانت الشيطان  
وانت اللي بيك  
وانت اللي ليك  
اتعملت الاوطان  
انت الكيان  
انت المكان  
انتي اللي اسمك  
عالورق مكتوب  
وعشانه عملوا  
خانة المهنة  
و وراها خانة العنوان  
انت اللي ممكن يوم عشانك  
تقوم حروب  
وتعيش قلوب  
وتموت قلوب  
انت الحلال وانت الحرام

وانت اللي ف اديك القرار  
انك ف لحظة تتوب  
والدنيا توب  
وانت يادوب قادر - على تفصيله  
وتعمله مقاسك  
وتخلي تفاصيلك - على أد تفاصيله

# خلاص يعني

خلاص يعني  
طلعتي بتعرفي تخوني  
طلعتي بتوعدي وتنسي  
مشيتي خلاص .. نسيتيني  
قدرتي ازاي وسبتيني  
ومعقولة  
محيتي ذكرياتنا الأولى  
ويوم ما حلفتي  
إني بقيتلك العالم  
بقيتك كونك  
ساعتها بيكي انا حسيت  
وحسيت كل مافيكي  
بضعفك  
وخوفك  
وبجنونك  
وبكسوفك  
ياريت عقلك يفكر تاني

ياريت قلبك دا يسمعني  
خلاص يعني  
طب اعمل ايه انا الوقتي  
وانا بتمنى .. لو اقدر بس  
أجيك تاني واشوفك  
خلاص عادي  
أكون الوقتي مع غيرك  
وسهلة عليكي إن انتي  
تكوني ف إيد راجل غيري  
خلاص يعني  
مش هتحنني وتغيري  
مش هتقول لي ليا أرجع !!  
ونظرة شوق ترجعني  
خلاص يعني  
طب اعمل ايه انا الوقتي  
أنا قلبي بيوجعني

## روحي نامي

طول عمري شاطر  
بس خايب  
طب مانتني عارفة  
وبعنيكي الحلوة دول  
شاهدة وشايفة  
طول عمري بسعي  
ف كل سكة وكل مسعي  
وانا كل ماسعي  
صحيح بكسب وباكل شهد  
ومع كل لحسة انا دوقتها  
انا كنت باخد وقتها  
100 ألف لسعه  
بتلومي ليه فيا  
وتجيبني فيا العيب  
وانا يعني اقوى من النصيب  
دانا عمري كله عدى مني  
غصب عني وفات

واهي ذكريات على ذكريات  
على ذكريات  
وان قولت يوم هفرح  
ملاقيش لقلبي ف الأمل مطرح  
وبقيت يادوب  
علشان احقق أي شيء انا نفسي فيه  
أنام وفيه أسرح  
لو بس كنتي بتفهميني  
او بيوصلك كلامي  
طب دانتي حتى  
رافضة انك تسمعيني  
الو الو الو  
طب روعي نامي

## أقول تاني إيه ؟

اول ما عيني شافتها  
ف ساعتها  
لقتني عشقتها  
ياناس دي عيونها  
يادوب نظرة منها  
بدوخ ف وقتها  
مشوفتش جمالها  
ولو غيري قالها  
بقلبي انا اقولتها  
امانة قولولها  
اني بحلم اطولها  
وانول ودها  
نسيت اللي شوفته  
وعشقتة وعرفته  
من بعد ماشوفتها  
زي الجمال دا مشوفتش أنا  
ولا عيني يوم

جات عليه  
يا صحرا وتاه فيها عقلي  
بجمال العيون دي وقلبي  
جنيتي عليه  
دانا لو ف ايدي اجي لرمشك  
وابيع عمري ليه  
ايه اللي ممكن ابيعه انولك  
وانا اضحي بيه  
ناديني بعنيكي تلاقيني ف اديكي  
..  
واقول تاني اي؟؟



# الصراحة

اتفقتنا ع الصراحة  
واول حاجة اقولها لك  
لقيت الشك ملا قلبك  
ورحتي لبعيد بخيالك  
لحقت نفسي  
وقلت اداري اي حاجة  
كنت ناوي اقولها لك  
لحد ما قدر اغيرك  
مفهوم الحب اللي ف بالك  
خلي الامور تمشي ببساطة  
يا حبيبتي اكتر من كدة  
علشان هانتعب  
لو فضلت حياتنا  
ماشية بالشكل دة  
بخاف اقول بحبك  
تقلبيها زعلة  
وينتهي كلامنا بخصام

وكل كلمه  
بقولها ليكي  
بالحساب وبالملام  
سيبي نفسك  
ماتخافيش  
لازم نحب  
عشان نعيش  
ده الحب هو  
احلى معنى للحياه  
وغيرنا ياما  
عاش ومات  
يتمنى لو كان يوم لقاہ  
كان عاش في راحه  
واتفقتنا ع الصراحه

## مش هاستنى

انا مش هاستنى تاني  
من الليلة انت عشاني  
ماهو مش معقولة  
هاضحي بحب  
إستنيته سنين  
ياللي انت خدت  
روحي انا مني  
معاك قلبي  
اوعى تبعد عني  
ف بعدك ثانية بنسى الدنيا  
فماتسيبنيش اعاني  
وانا مش هاستنى تاني  
من الليلة انت عشاني  
ماهو مش معقولة  
هاضحي بحب  
إستنيته سنين  
انا مش هاستنى تاني

من الليلة انت عشاني  
ماهو مش معقولة  
هاضحي بحب  
إستنيته سنين  
قبلك انت معرفش  
انا كنت عايش ليه  
وقابلتك انت فعشقت  
الكون علشانك فيه  
ابدأها معايا أحلى حكاية  
انا قلبي عليك رماني  
فانا مش هاستنى تاني  
من بكرة انت عشاني  
ماهو مش معقولة  
هاضحي بحب  
إستنيته سنين  
انا مش هاستنى تاني  
من الليلة انت عشاني  
ماهو مش معقولة  
هاضحي بحب  
إستنيته سنين

# فايل

فايل ع اللاب بتاعي  
مليان اوي  
مليان حاجات  
اشي فيه صور  
واشي ذكريات  
واول محادثه كانت بينا  
انا لسه شايلها  
وبفكر بيهما اللي فات  
هاي ممكن اتعرف  
انا اتشرف  
وضحك وقلش وهزار  
وغيره وحرقة ونار  
وخلاف وخلافات  
دا فايل ع اللاب بتاعي  
مليان اوي  
مليان حاجات  
وانتي بتشكيلي مني

وانا بحكيك عليكي  
ووانتي بتقولني اني  
بقيت كل اللي ليكي  
ولما قولتيلي انك  
هاتكوني انتي اللي ليا  
ولا ابعد مرة عنك  
ولا تغيبني عليا  
وفي النهايا برضه  
بعدنا من سكات  
فايل

ع اللاب بتاعي  
مليان اوي مليان حاجات  
صورك قبل الحجاب  
وقبل عليكي ماغير  
ومباركة الصحاب  
بالطرحه والتغيير  
والدبله والخطوبه  
وهانبني طوبه طوبه  
وادينا اهو بنينا  
مابيننا سد عالي

[illegible]

## بسم الإله

هي ايه الحكمة  
إن فيه جنه ونار  
وليه ضروري الانتظار  
والأمر ليه  
ماهوش اختيار  
والعلة ايه من تحريم الانتحار  
وازاي اعيش العمر كله ف الذنوب  
وكمان اموت  
وانا ملحقتش أتوب  
لسه عندي كمان سؤال  
ليه الحرام دايم  
طعمه أحلى من الحلال  
لأ و أسهل  
لأ و أوفر  
احنا كدا بنستسهل؟  
لا داحنا كدا قربنا نكفر  
كل شيء ف الدنيا دي



مخلوق بحكمة  
واحنا ما علينا غير  
اننا نآمن و نرضى  
حد فين ضامن عمره امتى هاينتهي  
او حتى إنه يعيش لبكره  
الحكاية كلها تتلخص ف كلمتين  
وف فكره  
التوحيد .. الإيمان  
وفكرة ان الكون بحاله  
مخلوق عشاننا  
ليه بقا نعيشها بعشمننا  
ليه منحسبهاش بالقلوب  
قبل العقول  
واللي مش فاهم  
يقول  
مين اللي قال  
ان السؤال  
دليل على ضعف الإيمان  
أو إنه جهل  
والله دي

# فلان

اللي ف عيلتي اعرفهم  
مايتعدوش عالاید والواحد  
لا بيشوفوني ولا بشوفهم  
والاسم الاخر عيلة واحده  
فلان

يريد ان يكون صديقك  
وفلان ده اصلا ابن عمي  
من دمه وهو من دمي  
والاقي فلانه بتتجوز  
وكم ان بتخلف  
وعيالها انا اصلا خال ليهم  
والله ما بخرف  
لابشوفهم ولا بعرف شئ عنهم  
غير ممكن اقرا اساميه  
واتفاجيء بعيلة كبيرة  
وقرايب واعمام وخلان

واسمع حكايات ثاني كثيرة  
من ابويا ومن امي كمان  
طب ليه الدنيا واخذانا  
للدرجادي بعيد عن بعض  
دانا عايش وكاني غريب  
وماليش ف الدنيا دي ولا حد  
ايه يعني لو يوم نتلاقى  
ونتجمع كده زي الناس  
نلعب مع بعض ونتشاقى  
ونعوض اجمل احساس  
انا ليا صحاب ومايتعدوش  
لكن مين فيهم على اسمي  
مين فيهم شبهني وانا اشبهله  
وملامحه وجسمه شبه جسمي  
ده رسولنا وصانا كثير  
نوصل ارحامنا ونتقابل  
انا بحلم مش حلم كبير  
باخواتي واهلي اني اتقابل  
نفسى احس بعزوة وعيله  
مش ناس بعرفهم بالصدفه

هاتكون دنيا بجد جميله  
لما نحس بود وألفه  
ود  
وألفه

## طلب صداقه

طلب صداقه  
وشوية ضحك وهزار  
وفصاحه وكلام بطلاقه  
وفضايح وكلام اسرار  
ما الفيس بوك دا زي القهوة  
زي الشارع  
زي النادي  
صدفة حلوة عليك تنادي  
ولا وحشة كله عادي  
بتقابل وتفارق ناس  
واحيانا  
ياخدك احساس  
مرة بيطلع  
احساس صادق  
ومرة يكون  
كذاب ومنافق  
الفيس بوك

دنيا ثانية  
جوة دنيا  
عايشين فيها  
فيه لقا  
وفراق ف ثانية  
وحاجات  
مايصحش نحكيها

## مخاصمني

زعلان بجد من نفسي  
من كتر ماباجي على نفسي  
من كتر ماقليت من قيمتي  
لحد ماتكسرت نفسي  
زعلان بجد انا من نفسي  
وبجد انا مش فاهمني  
ومخاصمني  
انا مخاصمني  
اقول اصبر اقول جرب  
اقول عدي واقول عادي  
سنين بتضيع من عمري  
وانا صابر .. و انا راضي  
ماهو جايز نهاية صبري  
راحة بال  
ومكتوبلي ف يوم فرحة  
وبيها تتعدل الاحوال  
اتاري ده كله

كان اوهام وعالفاضي  
وصبري كان غباء مني  
مخاصمني



## إفرد وشك

ومهما يطول عليا المر  
هايجي اليوم اكيد و يمر  
دا كل ال ابتدا بيخلص  
بحلوه و مره  
حتى العمر  
افرد وشك  
زعلك مش هياخر ولا هايقدم  
افرد وشك  
بالتكشيرة عمرك ما هتتقدم  
ال يوم مبقاش عليك  
وال عمره ما كان شاريك  
انت ليه تبقى عليه  
بالرخيص بيعه واوعاك تشتريه  
ابعد نفسك يلا بنفسك  
عن كل ال يخون ويعشك  
افرد وشك  
الحياة بنعيشها مرة بدون اعادة

فانت ليه تخليها مرة عليك و سادة  
خد قرارك .. فاجيء الناس بانتصارك  
خليك جريء  
ارسم انت بابتسامتك الطريق  
اللي كارهك ليه تسيبه  
يوم بعينه يهد عَشْكَ  
افرد وشك  
افرد وشك  
زعلك مش هاياخر ولا هيقدّم  
افرد وشك  
بالتكشيرة عمرك يوم ما هتتقدم  
ومهما يطول عليا المر  
هايجي اليوم اكيد و يمر  
دا كل ال ابتدا بيخلص  
بحلوه ومره  
حتى العمر

## غربل صحابك

غربل صحابك

وامحي اوام اسم اللي مش بيدق بابك

واللي ف مشاكله وف همومه وبس

دايما عامل حسابك

و ف فرحته تلاقيه نساك اوام وسابك

واللي ف وقت الشدة مايفكر يعينك

واللي عينه ف دنيتك سابقة عينك

وبيحسدك .. و ف كل حاجة معقدك ..

لو مرة شافلك خير

صدقني عنه بيبعدك

وال معطل خطوتك

وبيحبطك

وموقفك

معرفته دي هتكتفك

واللي عليك معرفته دي خساره

و ديته هزار وقاعدة فرفشة و سجاره

فارقه عشان هيخسرك

ولا عمره يوم هايقدرك  
بالعكس دا هيكدرك  
واللي يشوفلك خير  
ولا يدلك عليه  
او عى تبقى عليه

## مش حلوه

مش حلوه تحب ف حد  
وهو مبيحبكش  
وف عز مابتكون محتاجله  
مايجيش على نفسه  
ف لحظة عشائك  
ميحسكش  
مش حلوة تباع الدنيا عشان  
تشتري إنسان  
مستني يشوف منك غلطة  
يرميك بيها ف خانة النسيان  
او عاك تغلط غلطة غيرك  
ويهون حبك وياهون خيرك  
زي مابتهون على ناس تانية  
برضه ف تانية  
بيعهم ومتتعيش ضميرك  
مين عندك اقرب من روحك  
مين شالك او داوى جروحك

مين غيرك كان جنبك يوم  
ما وقعت وسندك لجل تقوم  
فيه ناس مخلوقة عشان تتباع  
وفيه ناس بتداوي الأوجاع  
وفيه ناس لو ملّت ف يوم ليهم  
حگم عقلك  
القلب اعمى  
والعين دائماً حكمها خدّاع

## حبیبتی

حبیبتی سر دفتہ جواہ  
بخاف اقلہ لحد فیہ یطمع  
بحکلی عنہا کل لیلۃ حکایۃ  
وانام وعینی من الفراق .. تدمع  
حبیبتی لیل  
حبیبتی نور  
حبیبتی  
مثل کون مہجور  
کل الی دخلہ غیری تاه او ضل  
عیونہا جیش  
وانا قلبی راضی إنیہ بیہ یحتل  
قولولی إنیہ الحل؟؟  
حبیبتی  
حبیبتی قسوة ف شکل حنیۃ  
إنسانۃ بس ف عشقہا جنیۃ  
وانا لما قولت بحبہا  
کان قلبی صافی النیہ

حبيبتي  
حبيبتي فيها مضاد للنسيان  
ولو حتى فاتوا سنين  
انا قلبي زي جنين  
والحبل سُري و سِري هي عشان  
عنيها فيها مضاد للنسيان

حبيبتي  
حبيبتي ساكنة مدينة عالساحل  
والبحر عالي و غالي مش ساهل  
وحتى لو تقسى  
ف عنيها ١٠٠ مرسى  
ومستحيل هنسى  
دي عنيها تستاهل

حبيبتي  
ساكنة مدينة عالساحل

حبيبتي  
حبيبتي حالة  
عشت فيها كتير ولكن  
تكرارها من تاني استحالة  
حبيبتي حاجة مهمة



بغيب عنها  
واجي تاني بكل همه  
وغصب عني  
ورغم اني  
بعدت عنها  
والسنين اخدتها مني  
زي ما اخدتني منها  
باقية حاجة  
حتى لو بدون مُسمى  
طب عارفة لما  
طفل فجأة ف يوم يتوه  
يبقا امله ف حد يوم  
عليه يحن  
او يضمه  
هي دي بكل اختصار  
حالتني لما يفوت نهار  
وانتي مش ويايا فيه  
انتي حلم عشت فيه  
وفوقت منه  
بس مش عارف ابطل

إني احلم  
إني بحلم  
يأما فيه حاجات كثير  
عائشة فينا بدون وجود  
جرحي مهما يكون كبير  
ثقتي فيا بدون حدود

## تشبه موت

كان قاعد ساكت  
ما بينطقش  
سرحان ف الدنيا  
و ف الملكوت  
وف عينه  
الدنيا دي ماتنطقش  
عايش بلامح تشبه موت  
لو قيسنا رضاه  
عن كل اللي ف عمره جراه  
نلاقيه سالب  
مش قصة مغلوب او غالب  
القصة  
ف ان نتيجة سعيه تملي  
واخداه لحالة نكران وسكوت  
فيقعد ساكت ومينطقش  
ويسرح ف الدنيا  
و ف الملكوت

## هي دي

هي دي اللي عشانها  
انا سبتك انتي  
وعلى وجودها جنبي  
كنت كتير حريص  
هي دي اللي بسببها  
عليا هونتي

..

اتاريني بعث الغالي بالرخيص  
اعذريني اني كنت  
حقيقي خايب  
لما بعثك انتي  
واشتريتها  
كنت بخسر روعي  
لما كنت انا فيها دايب  
وكسبت نفسي بجد  
بخسارتها  
كنت فاكرها هتقدر

تعوضني غيابك  
بس غابت  
بعدك انتي كل راحة  
صدقيني قلبي  
من ساعة ماسابك  
بيعاتبني وبعترف  
وبقولها بصراحة

..

بعدك انتي بعيش تعيش  
عشاني بعت الغالي بالرخيص

..

هي دي اللي عشائها  
انا سيبتك انتي  
وعلى وجودها جنبي  
كنت كتير حريص  
هي دي اللي بسببها  
عليا هونتي

..

اتاريني بعت الغالي بالرخيص

# آسف

آسف  
ايوة آسف  
إني كنت بصدقك  
وإني كنت معاك  
خامة للغباء  
وإني خُنت نفسي  
لما كنت بعشقتك  
وإنتي كنتي ف دنيتي  
خانة كبرياء  
وإني صدقتك ف حلم  
وإني حلفت لاحققك  
ايوة آسف  
إني كنت بصدقك  
شوفت فيكي  
كل حاجة حلمت بيها  
عشت بيكي  
دنيا كل الحب فيها

كنت حبيب  
بيكي عمري  
وعمري يوم  
ما خطر ف عقلي  
او ف بالي بالي  
يجي يوم  
وتضحى بيها  
نهيتيني  
وانا جاي ابدأك  
أيوه آسف  
إني كنت مصدقك



# أنا عاوز اتجوز

والنعمه ماكارثه اني اجوز  
وده عادي على ايه هاتبوز  
انا اصلي كبرت  
وشايفني ف نظري بقيت راجل  
واقدر اتحمل وافتح بيت  
وبعون الله  
في كلامي هاكون فعلا راجل  
واتحمل علشان حببت  
مش لازم بقى تعجيز وحاجات  
بتخلي الواحد يتعقد  
ويادوب يجوز ويكون مات  
من كتر ما طلباتكوا تعقد  
ايه يعني اجوز ويا امي  
ماهي طول عمرها بتشيل همي  
هاتقولي اسيبها عشان بنتك  
خد بنتك و ف داهية ياعمي



الشبكة ب 20 ألف جنيه  
وما فيش ولا حاجة واحدة عليه  
على ايه ياعم انت وعلى ايه  
من قلبي بقولك 100 احيه  
وكمان احيه

# Bent Elkab

مش لسه كنتي بتحلفي  
ان انتي عاوزاني .. و انك بقيتي بتعشقينني  
وبنحكي عن اول مرة لمست انا فيها ايدك  
وسكنتي عيني وانا .. سكنت ف وريدك  
وحلفتك بان القلب قبل العين .. يريدك  
وانك رميتي الماضي  
وعايشة ويايا ف .. جديدك  
وانك معايا للنهاية طول سنيني  
مش لسه كنتي بتسأليني  
لما كنت انا سهران عشان .. اقرا ليكي  
آخر كلام كتبته فيكي  
وحلفتك ولا كنتي راضية تصدقي  
ان كل حرف من حروفي ..  
مكتوب عشانك انتي .. وليكي  
وبتقوليلي  
ازاي بتكتب؟؟ وامتى وانت

طول اليوم معايا !!  
طب ماتقوليلي انتي ازاي .. شغلتي البال  
واحتليتيني ف أرضي .. وسكنتي ف سمايا  
وازاي بقيتي ف الخيال .. وحدك  
ازاي بقيت احلم باني بخطفك .. واخذك  
ازاي بقيت .. بالشكل دا عليكي .. بقيت  
وانتي اللي رافضة حتى  
ترفضي الماضي عشاني .. وناسياني  
هترجعيني ازاي لروحي  
بعد ماكتبتك انتي ف دنيتي .. عنواني  
والله انا بعاني

..

دانا كنت بتلك يوماتي بأي شيء  
عشان اقابلك  
وبرغم كل مشاكلي  
ومشاكلك  
واللي أثرها بان  
على شكلي  
وعلى شكلك  
كنتي انتي قابلاني

و قابلك  
وانا كنت بتلكك يوماتي بأي شيء علشان  
اقابلك  
وسكنت قلبك  
وسكنتي فيا .. بس بيا .. لسه مبترضيش  
قوليلي بعدك انتي ازاي اكمل  
وليه أعيش؟؟

..  
بتخيريني  
بين وجودك  
واني اسيب للماضي حنة  
من حدودك  
والله لو ف البعد عنك ميت مليون وجع  
او إني موت  
انا عندي اموت ..  
ولا إني اسيب منك لغيري .. لحظة منغيري  
تفوت

..  
يا حب حبيته ف وجودك .. و ف غيابك زاد  
#يا\_بنت\_القلب

حياتي اتلونت بيكي .. بزيادكي عناد  
انا غيرتي من حيرتي .. في إني ازاي اراضيكي  
معقولة يرضيكي .. بعد اللي بينا يبقا بينا بعد  
دا آخر ماييجي ف بالي ان انك ف يوم تسبييني  
مش كنتي لسه بتحلفي  
ان انتي عاوزاني .. وكمان انك بقيتي بتعشقيني



# أحلى جنان

أمان محسوس  
ف عزم الأمان متخان  
معاني كثيرة  
وبتدي للحياة ألوان  
يادوب النظرة ف عنيتها  
حياه ف حياه  
راحه بتيجي براحه  
وتمحي الآه  
هدوء مع شوق وحنية  
وأحلى جنان

لسه الوجد ثابت  
من وقت ما سابت  
واختارت الغياب  
غابت والضحكة غابت  
قلبي عمل ثابت  
وهو من الحرقه داب

جميلة ف كل شيء  
ومهما تغيب معايا  
أم القلب البريء  
هي وبس وكفاية  
هتعيشي قمري مهما  
تغيبني عن سمايا  
حتى لو البعد طال  
عمره ما هيقسيني  
لازم بينا وصال  
لا انساكي ولا تنسيني  
حبك عايش ف قلبي  
مهما طالت سنيني  
وهي الدنيا دي إيه غير  
اكمل بيكي دون تغيير  
وكلمة حلوة من قلبك  
تنسيني اللي كان قبلك  
وانا ف أحضانك الدافية  
يا أجمل شعر انا كتبتة  
واجمل سر انا كتتمته  
وجوة عيوني انا راسمك

و كل حرف من اسمك  
بقيت بظبط عليه القافيه  
وانا ف احضائك الدافيه  
وهي الدنيا دي إيه غير  
أكمل بيكي دون تغيير  
وكلمة حلوة من قلبك  
تنسيني اللي كان قبلك  
وانا ف أحضائك الدافيه



## في عز الليل

ليه ف عز الليل تصحى من النوم؟

-من شدة وجعي

أنا بعاني

في إيه تاني

-أنا بس صحيت كدا على ذكرى

وأنا كنت فاكرها خلاص ماتت

كمل يابني .. طب ليه ساكت

رجعت تطاردني ف احلامي

مش عامل راجل وبتحلف

ان انت خلاص ناسي سيرتها

وانك غيّرت مسار قلبك

علشان مايعديش على بيتها

أمال ازاي بقا مع غيرها

وانت بتتعذب منغيرها

وبتجيلك حتى ف عز النوم

صدقني يا صاحبي أنا فيك مصدوم

- وأنا زيك والله و أكثر

مش عارف انطق ولا افكر  
بمزاجي انا اختارت فراقها  
والوقتي بروحي بلوم روعي  
علشان أنا فعلا

مش هقدر

اوعى تفكر ف اللي ف بالي  
يا معلم حافظ على شكلك  
وافكر انها كانت دايم  
بتكون سر لكل مشاكلك  
دي لا كات بتحبك  
ولا صانت حبك  
وانت بنفسك قولت عليها  
كانت وهم .. بيتهياك

..

ما تفوق يا صديقي كدا لعقلك  
— زي اما تكون كدا ساحرالي  
او رابطاني اكون وياها  
دانا ببقا ف حضن بيعشقتي  
وبلاقي عيونها بتسبقتي  
وتاخذني بروحي لذكرها

وحتى لو بعد سنين فاتوا  
انا عيني مازالت فاكراها  
زي اما تكون كات جنّية  
لمستني وبعدين سكنت فيا  
زي اما تكون  
شيء مش م الكون  
واللي انا حاسه  
ده شوق للكسره  
وللحسره  
مش ليها هي  
مش فاهم نفسي ومش قادر  
انا فعلا كدا .. باجي عليا !!  
— مش لاقى كلام تاني ا قوله  
هتضيع عمرك عالفاضي  
ومفيش مشكلة عندك .. عادي  
هتضيع عمرك على وهم  
ولا عمرك يا صديقي تطوله  
..  
مش عارف .. اللي بتحكيه  
انا اسميه ايه ؟

غير انه رواية خيالية  
بدايتها هموم  
نهايتها هموم  
وعشقت ان انت تعيش مظلوم  
وعليها بقيت بتنام و تقوم  
..  
وف عز الليل تصحى من النوم

## أقول تاني إيه ؟!

اول ما عيني شافتها ف ساعتها  
لقتني عشقتها  
ياناس دي عيونها يادوب نظرة منها  
بدوخ ف وقتها  
مشوفتش جمالها ولو غيري قالها ..  
بقلبي انا اقولتها  
امانة قولولها اني بحلم اطولها  
وانول ودها  
نسيت اللي شوفته وعشقتة وعرفته  
من وقت ماشوفتها  
زي الجمال دا مشوفتش أنا  
ولا حتى عيني يوم جات عليه  
يا صحرا وتاه فيها عقلي  
بجمال العيون دي  
وقلبي بجمالك جنيتي عليه  
دانا لو ف ايدي  
اجي لرمشك وابيع عمري ليه

ايه اللي ممكن عشان  
بس انولك وانا اضحي بيه  
ناديني بعنيكي تلاقيني  
ف اديكي ..  
واقول تاني ايه ؟؟

# اليأس

انا رافض اليأس  
ال رافض فرحتي  
اللي مضلم سكتي  
يأسي ال ناوي يهديني  
وكل ماطلع خطوتين  
بيشدني  
ويهدّ ف قوتي  
انا برفض اليأس  
ال ف صورة دور زكام  
او جنيه ف البنك عام  
او فساد في خاص و عام  
ف دولة  
غرقانة ف زحام  
انا رافض اليأس  
ال ف حياتي كالكابوس  
او عيب ف نفس من النفوس  
او ف الفلوس

اليأس ممكن  
يبقا صاحب خاب رجاء فيه  
كان لابد اني ابيعه  
وعاللي بيني وبينه ادوس  
واني مبقاش يوم عليه  
واسيبه  
حتى من غير السلام  
انا رافض اليأس  
بالفعل كش بس الكلام  
برفضك يا يأس ياللي  
قاعدلي وفاضيلي تملي  
حالف على طموحي  
انك لابد تموته  
وتقفله سد ف سكته  
مستحيل هتسكته  
انا عندي حلم مصدقه  
حالف عليه لاهحقه  
ولو العالم بحاله  
اتجمع وشككني ف ذاتي  
عادي



هسيب الكون يهاتي  
ومهما قاللي  
هرفض الكون ال عايشه  
زي مايرفضك  
يا ياس ياللي  
قاعدلي  
وفاضيلي  
تملي

# جهل القلوب

الكلام عمره مايجيب غير كلام  
والجهل جهل القلوب  
عمره ماكان جهل العلام  
وخلص على ولاد الاصول  
يلا السلام  
من محنه على محنه  
ونسينا مين احنا  
واتبدلت ملامحنا  
منلومش غير روحنا  
لما زمانا على كلامنا يدووس  
ماهي كلمة ولاد الناس  
بقت بتتقاس بالفلوس  
واللي معاهم مال  
كله عليهم مال  
وعلى اديهم يبووس  
اصحوا وفوقوا بقا  
يا ناس ضعاف النفوس

لا الكفن كانه ف يوم جيب  
ولا عمر الموت بيفرق  
يا خلق طبعه عجيب  
مهما اقول وازيد  
ولا حد يوم يسمع  
ولا حد هيصدق  
انا م الكلام بحزن  
هسكت خلاص أحسن



## ليلة العمر

ف ليلة العمر و الفرحة  
ويوم المفترض إنه  
بداية لدُنْيَا الأحلام  
دموعها لمست الطرحه

ف نظرتها كلام وكلام  
حبيبها عمل لها مفاجأة  
ملاحها اتبدلت فجأة  
لحزن وضعف واستسلام

يا دُوب العين جت ف العين  
وايدها ف ايد واحد غيره  
حنينه ليها بعد سنين  
مخلي عيونه بيغيروا  
يقدم خطوة والثانية  
بترجع منه و ف ثانية  
لقاها بتبكي .. متحملش

وخاف لاوجوده يجرحها  
وقرر يمشي .. ميكملش  
وشاف نظرتها بتنادي  
كأن مفيش ف المكان غيرهم  
وكل الدنيا دي ف وادي  
قلوبهم رافضة تغييرهم  
تعالى ضمنى بسرعه  
انا مقدرش اكون غير ليك  
حبيبتي الليلة دي فرحك  
وانا ماليش ف الحياه بعديك  
بعادنا مكانش باديها  
ف دنيا ماشية بالمادة  
وداع مرسوم  
ف عنينا  
غرامنا أو انه  
خلاص عدا

## عَدَّيْنِي

مسكت ف ايدي وانا ماشي  
وقولت اكسب ثواب فيا وعَدَّيْنِي  
لقيت نفس الهبوط الحاد  
ف دنيا طبعها الإلحاد  
وبيا وبالأمل كافرة  
وحالفة لا بد تعديني  
وقفت ببصلي بحسرة  
ومحتارم اللي وصلت إليه  
بداري عني انا الكسرة  
ومكسوف  
من ملامح خوف  
بتكسيني  
لا عاد فيا أمل وطموح  
ومخنوقة ف روعي الروح  
ولا قادر اسويني واروح  
ولا عارف  
أعدَّيْنِي

بدور فيا ع الباقي  
ومش لاقى  
غير اني "لسه على ديني"  
موحد بالاله مؤمن  
بان الدنيا دي ابتلاءات  
ومهما شوفت مش ممكن  
اردف وقت م الأوقات  
بغير إني  
رضيت وأمنت  
ومع إني  
على حلمي  
بكيت وحزنت  
مكمل برضه وبعاقر  
هصبر روعي على روعي  
واهديني  
وعمرك يوم يا دنيا  
ماهتقدري تهديني  
ولو هفضل لآخر عمري  
مش عارف  
أعديني

# بتقولي ليه آسفه

بتقولي ليه

أسفه

وتوهميني ليه ان الشعور بالذنب

عائشاه وبياه حاسه

بتقولي ليه أسفه

علشان بقيتي السبب

ف تعبى ويا مشاكلي

بلاش الاعتذار دا ياريت

قصاد الناس عشان شكلي

دي مش حلوة

إن راجل مننا ف لحظة

بيان مجروح

كرامته تروح

ولو كان حتى من جواه

بيتوجّع

دا عزة نفسه كسرتها

اكثر من فراق روحه



اكيد توجع  
ووجعه دا ميفرقش  
عن وجع بنت  
حبيبها خدعها او باعها  
بلاش الكلمة دي احسن  
ف ليه نحزن؟  
نوفرها  
ونرحم قلبي دا المجروح  
من كسرتها ووجعها  
..  
بتقولي ليه  
أسفه

# أنا عاوزك

انا عارف ان انتي بعيدة  
وانك حلم وصعب كمان  
لكن الحاجة اللي أكيدة  
انا مش هأياس مهما ان كان  
انا عاوزك  
تكونيلي أميرة احلم بيها  
او نجمة .. أسهر لياليها  
عاوز وعد  
نكون مع بعض  
هرسملك جنة  
نعيش فيها  
انا عاوزك  
مش عاوز غير حبة شوق  
بيكي هكون اسعد مخلوق  
خايف  
لا تكوني حلم جميل  
وأموت

م الصدمة اما افوق  
وانادي عنكي  
مالاقيها  
انا عاوزك  
حبيني شيء من حبي ليكي  
خليني لو نظرة ف عنكي  
لو بقيتي  
ف لحظة ليا  
عمري كله  
هدية ليكي  
وروح  
وعيني  
لو تطلبها  
انا عاوزك  
ولو انتي فعلا عاوزاني  
واتحقق أكبر أحلامي  
يبقا خلاص  
ضحكتلي الدنيا  
وهعيش  
بيكي



ملك  
ف زماني  
انا عاوزك  
ومنايا  
أخليكي  
سعيدة  
وانا عارف ان انتي بعيدة  
وانك حلم وصعب كمان  
لكن الحاجة اللي أكيدة  
انا مش هأياس مهما ان كان  
انا  
عاوزك

# محتوى الكتاب

2	بطاقة الكتاب
3	الإهداء
4	قبل أول قصيدة
5	أبوي مات
11	حياة مدرسة
16	معلشى مافيش
18	مين فينا
20	أنا الكداب
22	اتعودت
24	تحضير الجن
26	الآشية فل
29	اعتصموا
31	ماتهيبيش
35	خلاص يعنى
37	روحى نامت
39	أقول تانى إيه
41	الصراحة
43	مش هستنى
45	فايل
48	بسم الإله
50	فلان
53	طلب صداقة
55	مخاصمنى

57	.....	إفرد وشك
59	.....	غربل صحابك
61	.....	مش حلوه
63	.....	حبیبتی
67	.....	تشبه موت
68	.....	هی دی
70	.....	آسف
72	.....	أنا عاوز أتجوز
74	.....	<b>Bent elkab</b>
78	.....	أحلى جنان
81	.....	فى عز الليل
85	.....	أقول تانى إيه
87	.....	اليأس
90	.....	جهل القلوب
92	.....	ليلة العمر
94	.....	عدينى
97	.....	بتقولى لى آسفه
98	.....	أنا عاوزك